

APUSTUA HERNANIN

BIZIKLETA GIZONAREN KONTRA

| **Joxan Goikoetxea.**

Izenburuari kasu egiten badiogu segituan pentsatu dezakegu baldintza normaletan makina gizona baino gehiago izan beharko lukeela. Baina Hernanin 50eko hamarkadaren hasieran jokatu zen apustu honetan bazen baldintza bat bi hernaniar hauen arteko dema dezente berdinduko zuena.

Euskaldunok sarri izan dugu apusturako joera gure historian, bai kiroletan (herri kiroletan nahiz orokorretan) bai eta apropos sortutako erronka edo norgehiagoka xelebreetan. Euskal entziklopediak ere *apustulariaren* figura definitzen digu, eta ez bakarrik apustua egin edo sortzen duenarentzat, baizik eta baita apustua jokatzen duenarentzat ere. XIX. eta XX. mendeetan apustulari ezagun eta famatu asko izan dira gure inguruan, eta aski ezagunak dira jendearen memorian gelditu diren hainbat pasadizo, marka eta anekdota. Besteak beste, gure herrian oso famatua izan zen Isidro Ollokiegi *Eltzekondo* indartsua. Gaur egun ere iristen zaizkigu hainbat apustu bitxiren berri zeinetan kirola, indarra eta maltzurkeria ere beharrezkoak diren irabazle suertatzeko.

Gaur zuengana dakarguna Hernanin gertatu zen. Data zehatza ez badakigu ere, 1950. urte inguruan izan zela esan dezakegu. Apustuan parte hartu zutenak Arriatsu baserriko **Felix Zeberio** eta Txonkuanea baserriko **Jose Mari Garin**. Garin korrikalari ospetsua izan dugu gure herrian, eta aski ezagunak dira bere garaipen eta marka ugariak. Apustua Ugaldetxotik Hernaniko kaxkoraino lehia izan zen, baina zein zen dema hau berdinduko zuen baldintza? Felix Zeberio bizikletan joango zela, baina katerik gabe!

Han hemenka galdetuz jakin dut ba omen zela garai batean ohitura edo joera horrelako apustuak egiteko, bizikletari katea kendu eta manillarra eta eserlekua lotzen zituen barra azpitik zango bat sartuz, bestearekin lurrari eraginez. Esango dizuet probatu dudala, eta ez dela batere xamurra. Ugaldetxotik herrira, Ereñotzutik pasatuz, aldapa dezente igo behar dira gorantz, eta garai hartako bide eta errebueltak ez ziren gaur egun ezagutzen ditugunak, noski.

Argazkian ikus dezakezuen moduan, ikusmin handia sortu zen, eta lehia pentsa daitekeen baino berdintsuago joan zen. Jose Mari Garinek ez zuen errepidetik egin bere ibilbide guztia. Fagollagara iritsi zelarik zubia gurutzatu eta Usategietara igo zen. Handik Okendoeneatik barrena Elorrabira jaitsi, eta, bertako zubia gurutzatuz, Tartatzuko gainera (Andolako gaina) atera zen, eta zein izango sorpresa? Bi demalariak batera iritsi ziren puntu horretara.

Zikuñagan behera, Txatxutegiko kurbatik Karabelera bizikletak hartu zuen azkeneko abantaila definitibo. Balantxako aldapatik Zinkoeneara igotzen ikus dezakegu Felix Zeberio irabazle moduan. Bere aurpegiak azaltzen du egindako esfortzua ez zela batere makala izan. Argazkian hainbat herritar ezagun, eta, noski, gaur egun bizi direnak oraino. Ezagutzen al duzu baten bat?

